

ESTD : OCTOBER, 1994

THLA TIN CHHUAK CHANCHINBU

August 2013

Kristian Naupang



- Lalpa in sak 2
- Competitive Exam leh Interview hmachhawn dan 5
- Savawmih Naupang sawmli pahnh a seh 8
- facebook leh Thirawlis 22 👍

Kum 18-na

August 2013

Bu 227-na

Editor

Upa C. Lalbiaktluanga

Managing Editors

**Rev. K. Lalpiangthara
Zohmingliana**

Joint Editors

**Upa Bonny Lalrindika
Upa Liansailova
Lalremmawia**

Circulation Manager

Lalfakzuala

K R I S T I A N N A U P A N G

Synod Office

Mission Veng, Aizawl -796001

Phone - 0389-2324590

e-mail:

kristiannaupang@gmail.com

**A man pe duh leh a bu la duh
chuan Circulation Manager
hriattir tur a ni.**

Kum khat lak man Rs. 50.

Kristian Naupanga thu chhuahte hi Editor ngaih dân a ni vek kher lo

A chhûnga thu awmte	Phêk
1. <i>Editorial</i>	3
2. Lalpa in sak	4
3. Competitive exam leh interview hmachhawn dân	7
4. Savawmin naupang sawmli pahnih a seh	10
5. Mizo Kristian naupangte hnena lehkhathawn	11
6. Tleirâwl nun	13
7. Ka zirna kawng chhuk chho (<i>chhunzawmna</i>)	17
8. Beidawng ringawt teh suh	20
9. Facebook leh tleirâwlte	24
10. Hriatzauna huang	27
11. Crossword	29
12. Chei chhuah	30
13. Bible milem	31-34
14. Ka hmuh ang hmu thei rawh (Inside Cover)	



Editorial



MOBILE PHONE

Mizote hi Mobile phone lawm ber hnam kan ni mai awm mang e, a tih theih hial em? Kan ram economic dinhmun ngaihtuahin thalai thawh chhuah la nei loten Mobile phone-ah hian sum kan va seng hnem tehlul em! Handset tha tawh, cheng sangruk chuang man vel kan hum fur mai nia.



Kawng lehlama ngaihtuah chuan, 'Kan neih theih phawt chuan eng nge i sawi tur awm,' tih mai tur pawh a ni thei tho mai. Handset man to tak kan lei tawh bakah thla tin tul lem lova thiante biakpawh nan sum kan sen ral hi eng zat tak ni ang maro?

Mobile phone hi kan nuna bet tlat, a tel lova kan awm theih miah lohna thil a lo ni reng tawh mai. Pathian biak ina inkhawm dawn pawhin kan keng lo thei tawh lo va, kan ken loh chuan mi famkim lo kan ni dawn tlata inhriatna kan nei tlat mai. Inkhawm tur pawhin Bible aiin kan dah pawimaroh zawk a nih ber hi.

Kan hun tha tam tak tul lova min paihralsaktu a ni reng mai. Zan rei tawh takah kan han mu a, rizai hnuaiah mobile phone kan la kheuh char char mai.

Kha thil khal chung khan lehkha kan zir a, kan ngaihtuahna min laksak a, kan hre thiam der si lo. Kan hna leh sumdawonna atan a tangkai em em thei. Mahse, tangkaina nei miah si lova pawisa leh hun khawhral nana mobile phone kan buaipui hi chu i inen Chiang teh ang u. I hlawkpui nge i hek phah zawk?

LALPA IN SAK

Sam 127:1-2; Mat 7:24-27

- Rev. Lalzuithanga,
Executive Secretary

Ni tina Pathian pawlna lehkhahu pakhat, Daily Bread-ah chuan heti hian a ziaak a, *'Pawisain in ropui tak i sa thei a; mahse, a chhunga thlamuang tak leh inngeih dial diala chen ho theihna erawh chu i sa tel thei lo, Pawisain khum tha tak leh nuam tak pawh i siam thei a; mahse, a chunga tui taka muthilh theihna erawh chu i siam tel thei lo. Pawisain i chaw ei dawhkanah chawhmeh tui tinreng i chhawp thei a; mahse, tui taka ei theihna erawh chu i chhawp tel thei lo,'* tiin.

He thu hian ka rilru a kaihruai thui hle mai a, pawisa hian thil tih theih tam tak a nei ngei mai, damdawi tha ber ber leh doctor tha ber ber a ruaiin a lei thei a, khawvela damdawi in tha ber berah pawh pawisa hmangin kan kal thei bawka, mahse, damna erawh min pe thei si lo. Ka chak zawnge te, ka duh zawnge te, ka awh zawnge te, pawh ka lei thei; mahse, lungawina leh hlimna tak erawh ka lei tel thei si lo, thiamna leh finna nei turin School, College, University tha ber berah te min kaltirin, thiamna sang tak pawh ka nei theih phah thei a; mahse lungawina tak erawh chu min neihtir thei leh tlat si lo,

ti tein ka ngaihtuah zui ta zel a. Ka han ngaihtuah vang vang hian 'Pawisain a tih theih bak chiah zel khi ka mamawh tak zawk chu a ni tih' ka hre chhuak ta a ni.

Ka ngaihtuah chhunzawm zel a, pawisain a lei theih loh chiah zel khi nei hmasa ta ila chuan in tha leh ropui te, khum nuam leh ei tur tuihnai te hi an va hlu lehzual dawn em ve aw! A nih loh vek pawhin, pawisain a lei theih loh khi nei ta ila chuan kan chenna in chu rap in chhawlbuk mai pawh ni se, hlimna leh lawmna in a lo ni ang a, **'cyclone mahasen** a lo thleng dawn,' tiin sawi sup sup mah se, thlamuang

takin kan mu siai siai thei dâwn si. Kan chaw ei dawhkânah te chuan maian bai mai pawh inchhawp se, in ropui taka rilru hlim lo tak chungah chawhmeh tuihnai tak tak inchhawpa kil ai chuan kan tlaipuar zawk ngei ang. Phai lama zirna in thaaah te zir ve kher lo mah ila, degree ropui tak tak te nei ve kher lo mah ila, pawisain a lei theih loh chiah zawk khi kan neih chuan nun hlutna dik hriat thiamna leh finna chu kan nei ang a, kan thlahte chaw khawn pawh an awm dawn hauh lo a ni.

America ram hausakna leh ropui bikna ziaktu chuan, *"America ram khu a luah hmasatute hi mi hausa leh ropuite an ni bik hauh lo va. Tin, a ram pawh khu khawvel ram dang aia a hausak bikna a awm chuang lo. Mahse, a luah hmasatute kha Pathian rinna kawnga mi duhtui leh fir, tih tak zeta Pathian zawnga, a thu awih tum tlat (Puritan)-ho an ni a, khawsakna bul an tan atangin an thil tih tur leh an boruak tawn reng rengah 'Pathian thuin engtin nge a tih?' tih chu*

an innghahna a ni thin," a ti. Tum khat pawh America rama Brazil President a zin tumin Roger Babson-a hnenah, "Engati nge nangni hmâr lam (North America)-ah in awma, keini chhim lam (South America)-ah kan awma, hetiang taka in ropuia, in hausak laia keini Brazil leh chhim lam ramte hi heti taka kan harsata, kan retheih bik le?" tiin a zawt a, Roger Babson chuan "Keini, hmar lam hi chu Pathian zawngtuten bul an tan a, chhim lam erawh chu rangkachak zawngtuten bul an tan ve thung a ni," tiin a chhang a ni.

Hmar lam (America) luah hmasatute chuan an zinga hri a lo len pawhin, Pathian thuin engtia awma, engtia tih tur nge a tih? tiin Bible-ah an zawng vat thin. Chutiang zelin tam a lo tlak te pawhin Bible an keu vat thin a ni. State/Province hrang hrangte khuan an Constitution an ruahman dâwnin Bible kênin, Pathian thu ang zelin an ruahman hlawm a ni. United States of America an

nih hma daih ațanga State hrang hrangte khuan Pathian thu ingnghah nana an hman avâng leh amah an țih tlat avâng khan vawiin thlengin khawvel sawrkâr chak leh ropui, hausa an lo nih phah ta a ni. Hmasang huna, Davidan, “Lalpan in a sak loh chuan a satute chuan an thawk rim thlawn mai a ni, Lalpan khawpui a wawn țhat loh chuan a vengtu chu a meng thlawn mai a ni” (Sam 127:1) a lo tih te hi kan tunlai hun atan hlei hlei hian a lo dik a ni. Lalpa in sak, amah nena bul țan, a duh zâwng țâwmpui leh a thu ngai pawimawha zawm tlat a nih chuan pawisain a lei theih loh zawng zawng te kan neiin, kan chang vek thei a ni. Chu nun leh chhungkua chu **harsatna thlipui**-in a chhem thlu zo lo va, Tsunami-in a khawih chhe thei hek lo, Lalpa in sak, Lungpui (Isua Krista) chung a rem tlat a nih vâng a ni.

Tunlai hunah hian mi tam tak chuan sum leh pai, hausakna hi nawmna leh hlimna, lungawina leh thlamuanna petu emaw tiin duhâmna leh mahni

hmasialna nen, dik lo leh fel lo pawh pawisa lovin, dâwt leh bumna te hmangin, sum hmuh theih dan tur a nih phawt chuan pawisak nei lo ang maiin an bei țhin a ni. Mahse, chung kut tling lo leh corruption hmanga an chhêk khâwl hausakna chuan lungawina leh hlimna tak zu pe thei hauh lo va! In ropui takah chhungkaw kehchhiain an awm a, sualna thlipui leh tui fâwn̄ten a chhem reng a, an ei châk loh zâwk leh tui an tih loh zâwk ei a ngai tlat baw̄k si, an hmangaihte an hlah̄n ni leh zân a tam țhin. Lalpa sak loh in leh a vên loh chhungkua chu thlipui leh tui fâwn̄ah a tlu sawp țhin. Chuvângin, America ram luah hmasatuten Pathian țihna leh a thu awiha bul an țan ang khan kan nun leh chhungkaw bul țan thar ve ila, sualna thlipui leh tui fâwn̄nin khawvel, kan ram, kan chhungkua arawn nam sawk sawk hunah pawh kan nghing ngai lo vang; **Lalpa ringtute chu Zion tlang tihnḡhîn rual loh, kumkhuaa awm reng tur ang chu an ni.**

COMPETITIVE EXAM LEH INTERVIEW HMACHAWN DAN

- Pinky Zosangpuui (MCS)

Competitive exam tih hian a huam zau êm êm a. Tunlaiah chuan professional course kan tih, heng MBBS, BDS, BE, LLB, etc. te college thaah kan zir duh chuan competitive exam kan paltlang a ngai tawh a. Exam-a kan rank azirte hian kan course zir theih leh kan college zir theihna turte a hril thin a ni. Hetiang a nih avâng hian competitive exam hi lehkha kan zir zelna turah a pawimawh êm êm a ni. Heng bakah hian sawrkâr hnuaiah hna nghet leh tha kan duh chuan, competitive exam leh interview hmachawn a ngai a. Competitive exam hi exam chu ni ve tho mah se, school leh board exam-te nen a inan loh avângin kan inbuatsaih dân pawh a dan hret a ngai a. Lehkha zir taihmak mai piah lamah, awmze nei taka zir a ngai a ni (study hard and also study intelligently). Point pawimawh tak tak a awm a, sawi vek theih a ni lo va, a pawimawh zual deuha ka ngaihte han târ lang ila:

1. Competitive exam kan tum a nih chuan regular takin lehkha zir tur a ni:

Competitive exam syllabus-te hi a zau êm êm a, exam dawna rei deuh deuh mena vawi leh khata thiam kim theih a ni lo va. Exam kan tum chuan kum tir atângin uluk takin ni tin kan zir tur bitukin regular taka beih a ngai a ni. Harsatna êm êm kan neih loh chuan coaching class zawm a tha a. Coaching class kal lovin a

tlin theih tho va, amah-erawhchu, coaching class kal hian mi a ti-regular a, ni tin zir tur min bituk a ni. Heng bakah hian course zau tak tak te hi zirtirtu thiam tak kaihhruaina hnuaiah chuan mumal takin a zir theih zawk a, coaching class-a test pek te pawh hian kan hriatna a tiha leh zual a ni. Objective type question exam tur kan nih pheih chuan syllabus chhiar kim a pawimawh leh zual a ni.

2. Exam Syllabus uluk takin en tur a ni: Syllabus-ah hian subject exam turte bâkah topic exam tur hrang hrang a in ziaik thin a. Heng subject leh topic-te hi an mark put dan turte a inang kher lo va, mark pu tam tur deuh te a awm thin a, mark pu tam tur subject-te hi uluk leh zualin kan zir bakah hunte pawh kan pek tam chuan exam-ah a scoring zawk a rinawm a ni.

3. Syllabus chhût chian tur: Syllabus kan en hian kan subject thiam zawng deuh te leh thiam loh zawng deuh te pawh a awm thei a, heng hi uluk takin kan chhut a ngai a. Kan thiam deuh subject, zir nuam kan tih deuhah te hian in-concentrate deuh a tha a, chungah chuan full marks score tum tur a ni. Thiam theih miah loh subject-te a awm thei a, hun chep tak karah thiam theih miah loh zir nana hun paih ral ai chuan exam hall-a hriat reng theih tur zawng zir nan kan hun tlem te neih hman hi a finthlâk zâwk a ni.

4. Zawhna hlui leh model question paper zir chian: Zawhna kalphung kan hriat theih nân zawhna hlui leh model question paper uluk taka zir chian hi a tangkai êm êm a. Zawhna chhuak thin zât kan hriat chuan zawhna pakhat chhan nâna hun kan neih zât tur te a chhût lâwk theih a. Zawhna chhân chhin te pawh hi a tangkai êm êm a ni.

A chungah tar lante bâkah pawh hian thil pawimawh a tam êm êm a; amaherawhchu, tunah hian tar lan vek theih a ni lo va, a pawimawh zuala ngaihte chauh târ lan a ni. Heng a chungah mi bakah hian exam dilna form a hun taka theh luh hi a tha a. A hun taka thil tih nachang kan hriat loh avâng hian chance kan hloh thin hi a pawi a, newspaper-ah te, TV-ah te hriattirna chhuah a ni thin a, heng hi competitive exam kan tum a nih chuan ngaihven reng tur a ni. Exam tura rilru kan siam tawh chuan ngawrh takin, tlin tum ngeia kan theihtawp chhuaha zir tur a ni. Competition a san em

avângin te ve mai mai tan
hlawhtlin theih a ni lo.

UPSC emaw, MPSC emaw hnuaia exam-a, Central sawrkâr officer lian emaw, State sawrkâr officer lian emaw ni duh tan phei chuan school naupang nih lai aṭanga ṭan lak a ngai a. School-a kan zirilaite hi kan thiamna 'foundation' tak tak a nih avângin a pawimawh êm êm a ni. Kan 'foundation' a ṭhat loh chuan harsatna tam tak kan tawk ṭhin a ni. Heng bakah hian newspaper te, current affairs magazine te, TV-a news channel te hi school naupang nih lai aṭangin kan ngaih pawimawh chuan kan general knowledge a tizau dawn a ni. General knowledge hi competitive exam reng rengah chuan a pawimawh êm êm a, interview ngaihna chinah phei chuan a pawimawh lehzuai a ni. Interview hi exam ṭhenkhatah chuan a ngai tel fo va, interview-ah hi chuan zawhna eng pawh zawh theih a nih avângin kan subject kan chian êm êm a ngai a. Heng bakah

hian GK tih^hthat a ngai a. GK hi vawi leh khata tih^hthat thut theih a nih loh avângin school kal lai a^hangin kan zirlai kan hriat chian a ngai a ni. Interview hi 'personality test' chi khat a nih avângin naupan lai a^hangin kan inpuahchah thei a ni. Mahni inring taw tak, mi dang kaihruai thei tur, mi zahawm, etc. kan ni em tih te hi interview-a an hriat duh ^hthenkhatte a ni ^hthin a. Hetiang a nih avâng hian school naupang kan nih lai a^hangin lehkhah ^htha taka zir bakah extra curricular activities-a tel te, kan talent neih ang ang develop te hi nakin zel atan kan inpuahchah lawkna vek a ni. Sap ^htawnga exam a nih ^hthin avângin Sap ^htawnga ^htawng uarte hi a ^htha a ni.

Competitive exam leh
interview te hi zirna ꯏha leh
hna ꯏha kan duh chuan a
pumpelh theih dawn loh a.
Amaherawhchu, rilru nei
taka lehkha kan zira, kan
hun awl neihte awmze nei
taka kan hman chuan
hlawhtling takin kan
hmachhawn thei a ni.

SAVAWMIN NAUPANG SAWMLI PAHNIH A SEH

- *Upa C. Lalbiaktluanga*
Kulikawon

Pathian zawlnei ropui tak Elisa hun lai khan Israel ramah savawmnu pahnihin naupang sawmli pahnih lai mai chawpchilhin a seh vak mai a. A mualphothlak hle. Pathian mi Elisa chu Jeriko aṭanga Bethel-a a chhoh laiin naupangho chuan an lo nuihzat a, an au nawmnah a, “Lukawlh, lukhawlh, tlan bo rawh,” tiin an lo au a. Elisa thinur chuan Pathian hmingin anchhia a lawh a. Ramhnuai ata savawmnu pahni an lo chhuak a, naupangho chu a rawn seh hlum ta mai a ni (2Lal 2:23-24).



Tunlai hunah hian naupang sual, nu leh pa zah lo, aia upa te zah lo, zirtirtute zah lo leh mi dangte zahpahna nei lo kan tam ta hle mai. Nu leh pa zilh ngam loh khawpa sual te pawh kan ni. Naupang sual sehtu tur savawm awm tawh lo mah

se, savawm aia hlauhawm zawk damdawi hlauhawm tak te hian tleirawl sual thenkhatte chu a seh mek a ni. Thuthlung Hlui hunah sual hawtu Pathian kha Thuthlung Thar hunah pawh a pangngai reng a la ni si a.

MIZO KRISTIAN NAUPANGTE

HNĒNA LEHKHATHAWN

- F. Ṭhuamliani
Kulikawon

To

Mizo Kristian naupangte u,

Naupangte ṭhian Isua hmingin chibai ka buk a che u. In hnenah thu pawimawh tak leh thuruk hrilh tur che u ka nei a; mahse, Setana hian chu chu a hlau êm êm a ni. Mahse, tunah chuan Setana chet vel dan leh a thiltih ṭhin dan zawng zawng ka hre chiang zel a. He thuruk hi tih khawtlai chi a ni lo tih ka hria a, chu chu naupangte ṭhian Isua hi Setana hian a lo huain a lo ngei êm êm mai a ni. Isua leh Setana hi an bulah ka awmin ka lo ṭhian ve ve tawh a. An lo inang lo êm a, tunah chuan ṭhian atana thlan tur zawk ka hre fuh tawh a ni. Chuvâng chuan, naupang kan nih lai pawhin tu lamah emaw zawk zawk kan ṭan a ngai si a. Nang pawhin i ṭhian atan duh i thlan sual loh nan thuruk ka han hrilh ve ang che.

Setana hi tu nge maw a lo nih chiah le?

Pathianin vân aṭanga a paih thlak avâng chuan Setana chu a thinur êm êm a (Thupuan 12:12 kha han chhiar teh). Pathian siam mihring leh thil siam dang reng reng tihchhiat leh tihboral hi a hna ber a lo ni ta a, mahse, hetiang reng chuan Setana leh a pawlte hian khawvelah an duh zâwng hi an ti reng thei

dawn lo va, ramhuai zâwl, Isuan a hnawh chhuahsak pawh khan Isua hnenah, “Hun tiam thlen hmain min nghaisa turin i lo kal em ni? Heta ta hi min hnawt chhuak lul suh,” a lo tih kha (Mt 8:29).

Pathian hun tiam thlen hma, rei lo te chhung hian ṭhahnemngai takin mi bum leh tihduhdah hna chu rim takin a thawk a. Rorel niah Pathianin an awmna tur

hmun a siamah chuan a paih thla dâwn si a. Chumi hma chuan hun an nei tlem si, mi bum hna chu an thawk char char a, nang pawh bum an tum zingah i tel ve tih hi karawn hrilhru che a nia. Lo inveng ran ang che. Setana thu awih-tute chan tur a chhiatzia hi naupangten kan hriat a hlau êm êm a. Naupangte chu sawi loh Isua meuh pawh kha bum a tum a nih kha. Chuvângin, Pathian pawhin a hmingah DAWHEHA, DAWTPA, a ti tawp mai a ni (Joh 8:44). Khawvela ropuina zawng zawng te kha a ta emaw a ti nia maw le. Khawvelah hian a power neih zawng zawngin a che a, khaidiat te, kaw l te pawh a tichhe thei a; mahse, Isua bulah meuh chuan a power chuan awmzia reng reng a lo nei lo va, hlauvin an khur zawih zawih mai ðhin.

Isua leh Setana chuan nangmah kha an ta ni turin an inchuh nasa lutuk che a nia. Hmanah pawh Mosia a thih khan a ruang mai mai pawh an inchuh a ni (Juda 9).

Michaela, Pathian Vântirhkoh khan, 'Mosia chu Pathian ta a ni a, a hmanraw ðangkai tak a ni,' a ti a. Setana ve thung chuan, "Mite pawh ka thahtir a, Pathian thute awih lo turin ka bum thei asin," a ti a, a chuh ve tlat a, a tawpah chuan Michaela chuan, "A nih leh Lalpan hau zawk che rawh se," a ti ta tawp mai a ni.

Setana chuan lo chuh ve mah se, Mosia chu Pathian ta ni tura Pathian hnena inpe a ni a, Pathian thu ang zela thil ti ðhin a ni si a, chu chu Setanan a hria a, a kalsan ta a ni.

Nang chu i vânni hle mai, bum thluka i awm ve hmain invenna hun i nei a. Isua hnenah chuan Setana aiin Amah i duh zawk tih hrilh la, a lamah ðang tlat turin inpe la, i thih hunah nangmah neitu zawk zawk in an ramah an hruai dawn che a nia.

Nang pawh, Setana leh Pathian hian an ta ni turin an inchuh ve ve che a, tu ta nge nih i duh zawk le?

TLEIRAWL NUN

(2Tim 2:22; Sam 119:9)

- Upa Lalnunsiamia Colney
Ramthar Tlangvoeng, Aizawl

Post modern world-ah kan chen tawh vâng nge kan tawngkam hman leh duh zâwnge pawh a danglam hle a. 'Saiha' te pawh a 'Seiha' tawh a, 'paih' te pawh kan 'peih' tawh a, 'tuai' te pawh kan ti 'pherh' zo tawh bawh a. A rei leh sei deuh kan ngai thei lo va, chuvâng chu ni maw, a lam tawi kan uar a. Kan chet dan a 'bon' tawhin a 'den' tawh hle a. Exer kan la a, chhass kan nei a, a chams te lahin bêm tu an ngah a, a nalh deuh te lah an lo spak tawhna khawvel a ni zo ta a ni.

Ram changkang leh intodelh tawhte tih entawnin, "Its my life" kan lo ti ve a. Eng mah thawh chhuah nei si lovin "ka duh ang angin ka nung ang" tiin awmhmuna kan lo pawr ve hle a. Miten hahthikula hna thawka intodelh an tum laiin tute emaw sum hmuhna turah kan lo au thler ve vak vak a. Hna thawk peih lo hian Nike fakna au hla, "Just do it" tih changchawiin a chhia leh tha pawh thliar lovin kan lo "just do it" ve ringawt a. Mi an urai chuan kan lo urai ve mai a, an cool chuan kan cool ve mai a, chhass an neih chuan kan nei ve leh mai bawh a. A ba thlauvin Mobile handset changkang kan nei a, tu man

kan tum chhuah a ni tih an hre chuang lo va. Eng mah thawk peih si lovin kan pawn lam nun kan intichangkang a, mi changkang leh nei nung zawkte incheina kan awt a. Milarte incheina maksak tak, mipui hmaa lamsarh leh danglam an tumna silhfente chu khawlaiah kan inchei chhuahpui a. Hmai plaster-na changkang hmanin kan inhnawih tai ve a, kan hnawih sen te pawh hnawih dum te, hnawih pawl te, hnawih hrin te a lo ni ta a. Tun hmaa kan sawi lar lem loh, depression-in min chim mek a. Foreign thawmhnaw tha leh make-up man to tak tak inbel chungin kan intihlum fo ta mai a. Chhungril nun

aiin pawn lam lan mawi kan duh a, Lal Isuan Pharisai-ho a hauhna chu, “thlanlung hnawih var, a chhung erawh mitthi ruh leh bawllhlawh tinreng awmna” a tih te pawh kan iang zo ta a ni ber mai.

Reality show lama an inchei dan thikin khawlaiah “confi” tawkin kan lo inchei chhuahpui a, thenkhat phei chu mawngtam leh chawnah te pumpui dang an nei ta emaw tih mai turin kan bawk thla thluah a. Popularity syndrome kan vei a, milar kan ngaisang a, an pian leh murna leh an chanchin kan hre êm êm a. JB-a leh a chhass Selena Gomez-i te inthen chhan te chu kan bye-heart sawi zar zar thei a, chutih lain kan lehkha zirnaa kan tangkaipui tur erawh kan hre leh thei miah si lo. A tul leh pawimawh aia a behbawma intlakral, kotlang ‘A’ team kan tam ta. Sap thufingin, ‘simple living high thinking’ an tih te chu ‘simple thinking high living’-in kan thlak ta em maw tih mai turin kan khawsa a. Hnathawh kawr ha zak tlat, kut leh ke no tak, city bus leh line bus-a chuang zak, bike mawng era fawr leu

zek zek nuam ti chi, kawrthindeng haa ngum khaka tatoo nei te pawh an awm nawk ta mai. Bengbeh pakhat mai duh tawk lova bengbeh thiang beha la duh khawp lova hnar bengbeh leh laipawng bengbeh (?) thlenga beh chi te pawh hmuh tur an awm ta. Zahna tur leh zah lohna tur pawh hre hrang lo, upa zawkte kawng ken tum miah lo pawh an tam ta.

Men rei leh thawh tlai hi changkanna emaw tia, tul lova meng rei, a tula meng thei miah lo, mahni khuma dar 12 pelh thlenga message leh thlalak maksak tak tak thawh thei, Internet atchilha, cyber chhass te hial nei, chaw ei dawna han kaih thawha tho tum bur, chawhmeh sawisel zuah zuah chi te pawh an tam ta. Vawi 1000 i tum khân i hmaiah vun chuar reh thei lo pakhat a insiam zel tih hi hriat tel a tha. Tunlaiah phei chuan tleirawl kawm tlak loh, mobile sik mual muala nui huk chi te, kawng lai taka kala motor horn peka phu dawrh chi te pawh an awm nawk ta. Tam tak hi chu thawh chhuah nei lo, top up

thun dawn apianga titau chung a thun thin an ni chawh. Kan Bible-in 'thawh lo chuan ei pawh ei suh se' a tih te chu a letlinga hmangin thawh lova ei hmuh tum, nui hmel aia tum hmel hmuh tur tam zawh pawh an awm nawk bawh.

Thil maksak leh danglam deuh chu a ti hmasatu nih tum, Setana biak thlenga tihmasatu, mahni nuna principle nei lo, mi'n an tih chuan ti ve thei nghal zel mai chi an tam ta, a pawh hle a ni. Setana betute hian an sawi thin chu, 'Kan dil hi min pe zel,' an ti a. Setana hian pe zel ni se ruk tur zawnga zan khaw tairek thleng thlenga vak leh VDP leh police vuak huama thil ruk tur zawng duk duk an awm lo vang. Tunlaia an sawi leh pakhat chu Illuminati hi a ni. A awmzia nia an sawi pakhat chu "One world, One Government" a ni. Mi challang leh milarte pawh member an ni a, member nih chu nakina ropuina tur a ni dawn a hriat avanga member nih dan zawnga tlaivar dawn dawna internet browse thin pawh an awm a ni awm e. He

thil hi inbumna mai leh awmze nei lo a ni a, JB-a pawh member ni ve anga puh a ni a, a website lamah member a nih loh thu chiang takin a sawi kha.

Mi aia thiltitheh leh chungnung deuh zawka lan chhuah duh avanga dinhmunin a phu loh thil, a ba thlauh thil lei kan awlsam khawp mai. Motor chhuak thar te, bike chhuak thar te, fashion leh make-up chhuak thar te kan hre thei em em a, chutiang nei theite chu kan ngaisang em em bawh. Bike nei lo chu chhass atan pawh kan duh ta meuh lo em maw tih tur a ni. Kan Bible-in, '*Hun hnahnungah chuan hmangaihna a dai ang,*' a tih angin hmangaihna aiin materialism hi kan buaipui tawh zawk em tih pawh ngaihtuah tham tak a tling ta. Mi neih loh thil ka neih theihna a nih dawn phawt chuan dawt kan pawisa tawh lo va, sakhaw mi ang taka lang chung si hian mi hmuh loh vah chuan eng mah pawh tih kan nei ta lo em maw tih turin kan nung a. Khawvelah chuan kan duh ang zawng zawng hi nei

vek mah ila Isua tel lo chuan vak bo kan ni tho tho dawn. Kan hriat reng tur erawh chu, khawvel thila tlan nasa apiangte hian nun beidawnna leh hrehawmna bak hmachhawn tur an nei lo.

Josefa pawh kha tleirawl te a nih laiin a pa thu awihin a u te hnenah a kal a, sumdawng hnenah an lo hralh a. A awmna apiangah Pathian a ñih a, Aigupta ramah awmin Potiphara nupuiin a lo *star* a; mahse, a tlanchhiatsan a. A tawpah chuan Aigupta Prime Minister a lo ni ta a nih kha. Tleirawl lai ațanga Pathian ñihtute chu a tawpah mi ropui leh chawimawi an ni ñhin. Khawvel mi ropui leh larte hi an nun han chhui hian an naupan lai ațanga Pathian ñih mi an ni zel. Kan Bible-ah tirhkoh Paulan Timothea hnenah tleirawl chàkna tlansana, thinlung thiang-

hlina Lalpa hming lam apiangte zingah felna te, rinna te, hmangaihna te, remna te um turin a ti a ni. Tleirawl chàkna tlansanna ñha ber chu Lalpa hming lamtu, Kohhrana tel hi a ni a, chuta tel apiangte chuan tleirawl chàkna hi an tlansan zel ñhin a ni.

Sam 119:9-ah khan tleirawlin an awm dan an tih thianghlim dan tur min hrihl chu, "I thu ang zela a awm dan veng ñhain" a ti a nih kha. Tuna ka awm dan hi Krista chanchin ñha nen a inmawi em tih hi kan inenfiah rengna tur a ni. Pathian thu ang leh Pathian duh zawnga nung te chuan khawvelah nun hlawhtling, nun duhawm, nun hlim an nei a, chu bakah chuan, khawvel lo la awm turah hlimna tluantling leh chatuan nunna an chang dawn a ni. Chutiang nun chu i nei tawh em?

Thufingte 3:6-7

*I kawng zawng zawngah amah hre reng la,
I kawngte chu a kawhhmuh zel ang che.
Mahni ngaihin intifing suh la;
LALPA chu ñih la, sual kalsan rawh.*

KA ZIRNA KAWNG CHHUK CHHO

Chhonzawmna...

- Upa Dr. L.N. Thuanga

High Sikulah

Mizorama High School hmasa ber 1944 kum khan, Mission Vengah hawn a ni a. Chu High School-ah chuan 1947 kumah Pawl 7 ka zawm ve a ni. High sikul naupangah chuan a te ber pawl ka ni. YLA hall-ah tlar hnung berah ka thū a; ka thutpuite chu Durtlang atanga lo kal pahnih (muthlu deuh reng) leh Neihbawi lal fapa leh Thakthing veng a mi, Ruata, Pu Zotuawnga fapa, milem ziaik thiam tak te an ni a. Ruata hian Chhura lem leh eng eng emaw lem a ziaik deuh reng a, kan hlimpui hle thin. Zirna lamah rilru kan pe tam vak lo. Class VII-a min zirtirtute zinga ka hriat zui deuh berte chu Pi Teii te, Pu Lalsanga te, Pu Khawtinkhuma leh Pi Malsawmi te an ni a; Headmaster chu Pu Lloyd-a (Rev J M Lloyd) a ni. A kum lehah chuan Thingpui Huan lamah kan insawn pheii ta a, ni tinin Mission Veng atangin kein kan kal thin.

Sikul naupang zingah pheikhawk bun an la awm meuh lo, a bun chhun pawhin puan pheikhawk an bun ber a, mipa naupang zingah pawh kekawr tlawn ha an la tlem hle. Tuk tin zing tanna kan nei thin a, Sap tawngin kan ti thin. Lal biaknain kan tawngtai rual ziah thin baw. Zirlai thenkhat hotute zuiin Champhaiah an han kal a, mi hriat turin Lal biakna hi Sap tawngin an insawi chhawk a ni awm e. Pakhatin, "Our Father" a han ti a, a dangin

"which art in heaven" a han ti ve leh a, a dang lehin "Thy kingdom come" a ti a, tichuan an insawi chhawk zel a, a ngaithlatute chuan "Sap tawng an va thiam em em ve!" an ti e, an tia lawm! Tak tak ni maw?

Additional Mathematics:

Pawl kua (1949) kan han kai chuan Pu Zairema, B.Sc., B.D. hovin Additional Mathematics tan a ni a. Kei pawh ka tuina lam a nih ve avangin ka tel ve zel a, hei

hian ka zir zelnaah pawh nasa takin kawngro a su chho ta a ni. Joint Director of Education ka nih laia, Ph.D. ka tlin lawmna 1974 kuma, Tuikhuahtlanga kan neihah pawh Pu Zairema hian thu a rawn sawi a, hetia min lo zirtir tawh thu hi a sawi chhuak nghe nghe a ni.

Aizawla zir lai hun: Ka u Zaii te chhung chhangchhe tak ina awm ka nih avângin ka buai thei hle a, in lam hna engkim - ei rawngbawl, nau awm, insuk, thing phurh, tui chawi leh hna tul apiang ka thawk lo thei lo va. Vawi tam tak nau paw mu chungin Algebra ka chawh mawlh mawlh thin. Ka hriselna a tha vak lo va, hnar thi te ka ching a, ka cher em em bawh a, ka nun kawng a awlai lo hle. Pathian venhimna azarah ka tlang ve thei zel a ni.

Sikul banah vawi tam tak thing phurin vai lui kamah kan pheh thla thin a. Chaw thing bar tur a awm chang chuan a ziaawm a; ril tam chung a kal chang pawh a tam tho mai. Kalpui tur thin an awm ve deuh zel a, thing ro kan fawm a, kan tel a, kan dinpui theih tawh velin kan

pu haw thin a, kawng chu a chho tluan parh a ni mai a. Hetia kan lo inhman thin vâng te pawh hi a ni mai thei puitlin hnua kawng na kan sawi deuh reng chhan pawh hi! Pathian khawngaihna kan lo tuar tlang ve zel chu a ni a. Thingtlang naupang zirlai Aizawla awm tam tak pawh chutianga khawsa chu an ni ve tho a ni.

Kohhran inkhawm ka ngai pawimawh em em a, thil tul eng emaw avanga inkhawm thei lova ka awm chuan hrehawm ka ti thin a; lehkha zir thulh pawhin ka inkhawm fo thin. Ka inkhawm vanga ka zirlaia ka chak loh phahna ka hre ngai lo. Aizawla lehkha zira ka awm chhung hian harhna tum hnih emaw lai a thleng a, mahse lam ve lovin ka khawchhuak a ni. Mi zak thei tak ka ni a; tawngtai erawh ka uar ve hle.

Kum (1949) tawp thlasik chawlh a lo thlen chuan kum dang ang bawkin kan khua Bukpuiah ka haw a, buh lain ram ka riak ve a; buh lak zawhah buh kan chhek zui nghal a. Chu chu ram lama hna hram ka thawh ve leh chhun chu a ni deuh mai awm

e. Kum a lo thar chuan zir zawm turin Aizawl lamah kir leh a t̃ul ta a. Kan lo tlangval ve t̃an tawh a, Krismas leh Kum Thar vel pawh t̃hianten hlim takin kan hmang a; kham lo takin kan khua chu, t̃hian thenkhatte nen, ka chhuahsan a ngai leh ta a ni.

Matric ka pass: Zirna lamah pawh t̃hahnemngaih nachang kan lo hre ve deuh ta a; Pathian khawngaihna hma pawh ka sawn ve hle a ni ang, kum tawpa Class X test exam-ah chuan kan pawlah pakhatna ka ni ta hial a, mak pawh ka ti hle - Pathian khawngaihna liau liau a ni. High sikula pawl sang bera thiam ber chan ka han chang chu ka t̃hianten pawhin min zah phah sawtin ka hria.

A kum leh 1951-ah Gauhati University hnuaiah Matric kan exam a; kan pawl (batch)-ah pathumin First Division kan tling a - chungte chu K.L. Rokhuma leh S.R. Vala te nen kan ni.

Cotton College, Gauhati-ah: Matric results kan nghah lai hian ka inhlawhfa ve zar zar a. College-a kal chu ka tan theih loh tur saah ka dah a;

mahse, ka chak êm êm a, a rukin ka t̃awngt̃ai fo t̃hin a. Pathian khawngaihna luang liam avâng chauhvîn ka tan kawng a rawn inhawng ta a; ka ngaihtuah kir chang pawh hian mak ka ti hial zawk t̃hin. Pathianin mak takin rem min ruatsak a; ka mamawh hunah puitu t̃ha tak mak takin min pe zel a. Gauhati lama lehkhâ ka zuk thawnte pawh t̃ha takin chhanna ka dawng zel mai a. Tichuan, chutih laia Bukpui khuaa neinung deuh ber, kan laina hnai, Pu Lalhmuaka hnen a t̃angin Rs 200.00 (cheng zahnih) kan puk a; Gauhati ka pan thla ve ta rawih mai a (Pu Lalhmuaka hi Dr. Tlangkunga pa nau a ni).

Matric results nghah chhung vel hian hna pathum lai ka dil ve a. Chungte chu Asst. Teacher, Saitual Middle School te; PWD office-a clerk hna te; leh Asst. Sub-Inspector of Police hna te a ni a; hengah hian ka hlawhchham fai vek a ni! Heng hnate hi lo hmu ta ila, ka nun kawng chu a danglam hlein ka ring. Hetia ka hlawhchhamnate hi 'mal-sawmna inthup' (a blessing in disguise) a lo ni ngeiin ka hria - Lalpa tih a ni! (*awm zel tur*)

BEIDAWNG RINGAWT TEH SUH


- Upa Bonny Lalrindika

Khawvelah hian duhsakna dawng ve thei lova inhria kan awm. Hmangaihna te, lainatna te hi miin an dawng nia kan hriat laia a kal kan bik nia inhriat hi a hrehawm thin hle mai. Dikna nei theuh nia kan inhriat laia kan dikna chanvo chu hmu lova inhriatna neitu chu a na em em thin.

Nia, kan chanvo nia hriat ngei dawn ve loh hi thil awm ngei chu a ni. Mahse, dawng lo thin tam berte hi chuan dawntir loh theih lohna tham chungchuanna nei tura an inbuatsaih theih chuan an dawng thei tih a chiang fo. Chuvangin, thil tha kan dawn loh kan sawi thin tam ber hi chu kan beih nasatnain a la phu loh vang a ni thin.

Mihang tlangval Robinson-a chanchin in hre thin em? Robinson hi January 31, 1919 khan Cairo, Georgia-ah a piang a, mi hausa rama lo nei hawha ei zawng chhungkua atangin harsa takin a lo seilian a ni. Natna hri hlauhawm tak Spanish flu leh zawnghri avanga khawthlang ram a buai em em lai kha a naupan lai a ni.

Unau panga zinga naupang ber a ni a, a pa chu Jerry Robinson a ni a. A hming



tluan chu Jack Roosevelt 'Jackie' Robinson a ni a, a hminga Roosevelt lo tel ve hi America President 26-na Theodore Roosevelt an ngaihsanzia lantirna atana an dah tel a ni nghe nghe. He president hi Robinson-a pian hma ni 25-ah khan a lo thi hman chiah a ni.

A pa hian kum 1920 khan a chhuahsan a, a nu hovin Pasadena, California-ah an pem ta a. Pasadena khawpuia Hmarcha Veng an tih maiah

chuan in te tak te pahnihah an khawsa a. A nu chuan a theih ang angin chhungkaw chawm nan hna a thawk a, hna vawn ngheh mumal a neih theih loh avângin an harsa hle. Chutiang chuan rethei tak leh ei tha pawh hmu lovin Robinson hi a lo seilian a, thin pawh a nei pachhe hle a ni.

Robinson pawh a beidawng a, chan chhe bik tak maia an awm leh chumi avânga thil reng renga palzam an hlawn bik reng chuan a rilru a tinain a tihrehawm êm êm thin. Thinrimna te hian a luah a, a tawpah phei chuan gang pawl pakhat a zawm ve ta hial a. Mahse, a thinpa Carl Anderson chuan a thlem chhuak leh thei hram a ni.

American baseball player zingah African American mi Major League Baseball (MLB)-ah tunlai huna inlan thei hmasa ber a ni a. A inlan tirh lai khan Robinson hian eng ang taka mi pawimawh nge a la nih dawn tih a ngaihtuah ngai kher lo vang. Mahse, thiltum pakhat a nei a, chu chu anni ang chi an len ve

lohna hmuna len ve tum tlatna a neih kha a ni.

Tichuan, he tlangval hian a dikna chanvo an pek phal lohna hmunah khan a retheihna leh thlei bik a nihna kha thu chung a thapui lo khan, tel ve lo thei lo nih kha a tum tlat a. Baseball khawvela vun rawng vânga inthliar hranna ngeiawm tak chu a rawn titawp ta tak tak a ni.

A thiamna leh chakna te, a theihna te avâng khan Brooklyn Dodgers team chuan a vun rawng vânga en khum phal lovin an la ta a. April 15, 1947 khan base khatnaah bul tantuah an hman ta chat mai a. Brooklyn Dodgers team chu major league team zingah 1880 chho hnu lama mihang player hman leh hmasa berah an tang ta a, tun thleng hian an la inchhir lo.

Dodgers team-in mi sawisel pawh phurh phah an ngamna tham khawpin Robinson hi mi itawmah a inchher chhuak a. Mihang player-te tan kum sawmruk vel zet chhung Negro league chauh khelh phal thin kha a rawn titawp a. Robinson

avângin American-ho nun-phung leh rilru sukthlek zawng zawng a inthlak ta vek a ni.

Number 42 : He number hi eng vânga pawimawha American-ho khuan ngaina riau nge an nih i hria em? A chhan dang a awm hran lo. Kum 1955-68 inkar chhunga African-American Civil Rights Movement nghawr chhuak hialtu Robinson-an an team tana a hak thin number a nih vâng chauh zu nia maw le! A chan chhiat bikna avânga a thinrimna hrithlaa Gang pawl a zawm kha lo kir leh lo ta se Robinson hi khawvelin a hre reng hauh lo vang.

Mihangte tel ve thian lohna hmuna mihangte tana kawng hawnga, All-Star Game vawi ruk zet tel thei, MLB Rookie of the Year Award an tih hmasak ber tum, kum 1947-a dawng hmasa bertu, National League Most Valuable Player Award mihang zinga dawng hmasa ber thei a ni bawk. Robinson hi Baseball Hall of Fame-ah 1962 khan lak luh a ni.

1997 khan Major League Baseball chuan amah

chawimawina atan a uniform hak thin number 42 chu major league teams khawvel pumah tu ma hak tawh loh turin a serh hrang ta nghe nghe a ni. Infiamna khawvelin mi mal ngaih-sanawm bik chawimawina atana an form hak thin number mi dang hak ve tawh loh tura an serh hransak hmasa ber a ni.

April 15, 2004 a tang khan Major League Baseball chuan chawimawi tawkin an la inhre lo cheu va, kum tina hman thin turin "Jackie Robinson Day" a siam thar ta a, he niah hi chuan team tina player zawng zawngten number 42 hi an ha vek thin a ni. Robinson hian baseball khelmualah chauh lo pawh vun hang zinga MLB television analyst hmasa ber nihna a nei bawk.

Khawvelin theihnghilh lo se: Jackie Robinson chanchin hi thamral mai mai tura phal chi a ni lo reng a. A nun kawng chanchin a tang tunlai thangtharten ngaihtuah dan dik kawng khat tal an chhar chhuah theih beiseina avângin a kawr hak

thin number '42' hming chawi hian film siam a ni a, Brian Helgeland-an a ziak a, a phuah baseball player Jackie Robinson-a film chu North America-ah April 12, 2013 khan tlangzarh a ni a, khawvela film ngaihven hlawh ber pawl a tling nghal.

Khai le nang kha, i nunah vuivaina i ngah em? I thin te a rim thin em? Tihtauh te i chak thin em? Chan chhe riauva inhriat vâng hian mi tam tak an lo intihlum tawh a. Vuivai chhan tur tha tak neiten chhuanlamah hmangin a hma aia chhe lehzual zawka

mahni insiam phah nan pawh an hmang bawh thin.

Mi dangte aia chan chhe zawk i chan hun a awm fo dawn a, chutiang hunah chuan Robinson-a ngaih-tuahna hi hre chhuak teh. Duhsak hlawh ve phak lova inngai tam takte hian duhsakna hlan loh phal rual loh khawpa thiltih ropui neih theihna remchang kan nei hlawm ngei ang. Mi naran hnuai lam mah Robinson-a vângin khawvelin number 42 an nghaihlu ta a nih chuan, i nun leh thiltithe avângin eng emaw chu i tihlu ve thei ngei ang.

1. Sava a intam hleih.
2. Lawng puanzâr a awm ve lo.
3. Lawng flag a insei hleih.



4. Lawng tial dân a inang lo.
5. Lawng ngula sava a awm ve lo.
6. In chhâwng a insân hleih.

facebook leh TLEIRAWLTE

- VL. Muanchhana, Mission Veng

Tleirawl pakhat chu a rilru a hah lutuk beidawng chuan intihhlum duhna hial a puttir a, mahse facebook-a a thianta chuan Pathian thu tha leh nun hlutna tak mai an hrilh atangin nun thar a neih phah a ni. Hmanni lawk May 13th 2013 khan tleirawl pakhat, kum 15 chu facebook-a a thian chhar chuan bumin a thian nia a ngaih chu mipa puitling tawh mi sual lo ni rengin, chu pa chuan a thlem chhuak a, a kidnap a, a that zui baw. A paw hle.

Facebook: Facebook chu computer emaw, cellphone/mobile phone-a internet hmanga inkawm hona leh thu, thlalak, music leh thil dang dang inthawn tawna a ni.

Facebook hi kum 1984 May 14-a piang American tleirawl Mark Zuckerberg-an kum 2004 February thla khan a duan chhuah a nia. A tira han hmang pha kha chu tlem te, Harvard University zirlaite chauh kha an ni a. Tunah chuan khawvel mi 11,10,000,000 (1,110 million/ maktaduai 1,110) velin an hmang ta. Facebook hi ram ni ta se khawvel ram lianah 3-na a ni dawn a ni. Tunah hian tawngchi hrang 70 a hman theih tawh leh nghal.

Facebook hi a tangkaina a tam rualin a tangkai lohna kan ti dawn nge finkhur a ngaihna lai pawh sawi tur a tam hle awm e.

Tleirawl: Tleirawl chu, "Sapin teenager an tih kum 13-17 inkar Mizo-ah chuan kum 21 tlin hma zawng pawh ni se, that lai hun hmang chho mek, thil thar leh thil changkang ngaisang leh 'ti chhin chak' rual leh 'tunlai' thil ngaisang em em kan ni," tih kan mi thiamten an sawi hi a dik a ni. Hruai sual awlsam lai kan nih rualin hruai that theih hun lai tak kan ni baw. Hma lam hun thui tak thlir tur nei kan nih avangin 'tun' kan tleirawl lai hi a pawimawh em em a ni.

Tichuan le: Tichuan, tunlai thil changkang leh tunlai tak 'tleirawlte' mai ni lo, kan u te - nula, tlangval leh kan nu leh pate khawvel angkhata min rawn nektu - 'facebook' hi engtin nge tleirawlte hian kan hmachhawn ang le? Internet Mizoramah kan hman hnuin

tun hnai kum 2-3 kal ta vel aṭang khan Mizote pawhin he facebook hi a nawlpuiin kan hmang nasa chho êm êm a. A hmang hi kan pung tulh tulh dawn ni pawhin a lang. Fimkhur leh ṭangkai taka hman dan tur inzirtir leh sawi uar hi facebook min rawn nek mektu kan lo hmachhawn dan tur chu a ni awm e. Puitling tawhte hi chu rilru lamah pawh nih tur ang an nih tawh avângin 'thil thar' leh 'nunphung thar' lo awmah awm dan an thiam theih viau laiin keini naupang leh tleirawlte tan chuan rilru insiam leh puitlin lam pan mek kan nih avângin fimkhur a ngai a, zirtir leh venpui ngaihna laiah pawh kan rual u zawkten min venpui hi a pawimawhin a ṭul viau a ni. Kan nih tur ang min nihtir lotu a ni hlauh thei.

Ṭhian kawm nuam leh a huhova awm nuam ti tak keini tleirawlte hian mahni chauh pawha awmin mi dang nena inbiakna hmanrua a tam tawh hle. Chu inbiak hona hmanrua (social media) pakhat facebook hmang hian kan ṭhianta kan kawm a, thlalak leh video thlengin kan inthawn tawnin kan titi ho va, kan birthday inhriatsakin kan lawmna leh

lungngaihna kan dah (post) apiang kan facebook ṭhianten min hriatsak nghal mai a ni. Kan khawvel hi tun hma ngaihtuah chuan a danglam tawh ngawt mai. Hei hi a nuam dawn ema a lan avângin thil dang tih ṭhulh ṭhaka buaipui a awl êm êm. Hei hi a nuam kan tih viau lai hian hun ṭha khawhralna a ni thei a, kan career (zirlai leh hnathawh) kan zawhna kawngah min titui lovin kan nih tur ang min nihtir lotu a ni daih thei.

Technology lo chhuak thar apiang kan ban phakah a awm nghal a ni mai a, khawih leh hmuh mai duh tawh lovin neih ngei kan duhna hian nu leh pa tan phurrit a ni thei a ni.

Facebook-ah hian 'dan' awm chu dawt sawi awih loh a ni. Facebook-a inzhiah luh (sign-up) dawn hian kum zat kha dawt sawi miah loh tur. Kum 13 chin chung lam tana hman tura duan niin i kum dik tak i dah khan, kum 13-17 tan pheichuan facebook enkawltute hian him taka facebook chhungah hian i awm theih nan i thil post leh thlalak i dah te pawh kha i ṭhianta leh ṭhianta ṭhian bak kha hmuh an phal dawn lo a ni, chutiengin thil dang dang

pawh. Sawi tur tam tak a awm awm e.

Facebook hi kan hmang a nih chuan a hnuaia thute hi hriata zawm a tha –

1. Facebook-a i thu leh thlalak dah chhuah a tang hian eng ang mi nge i nih a tilang a. Miten mi eng ang nge i nih an hriat atana i duh dan ber kha lantir tumin nih tum baw ang che. vawiin mai ni lo nakinah pawh min an la hmuh theih reng tur i dah tihna a ni.

2. Kan awmna hmun, kan thil tih leh kan bula awmte thlengin kan thil post kha hlimawmin kan thianten an lo hmuh nghal khan a hlimawm viaua a lan lai khan, kan thu dah khan mi rilru a tina thei a, chu mai ni lovin tu emaw chuan i thil post avang khan tihletna che a zawng thei reng a ni tih hriat a tha.

3. Password tu mah hrilh lo la, *hmelhriat chauh thian-ah pawm (accept) rawh.*

4. I nu leh pa leh zirtirtuten an hmuh atana i duh loh chu eng thu mah post suh.

5. Thil tak tak post rawh, a lemin nung suh. Him taka vawn dan hriat tumin inzir tel ang che. Kan nu leh paten an

hre thiam lova min zawh pawhin eng nge a nih chiaha eng nge i tih hrilh chian ngei ngei tur a ni.

Kum 2012 HSLC (Class X) result pass percentage kha 72.27% laia ni a, kumin 2013 kha 58.63%-ah a tlahniam hle mai. A chhan awm thei zingah facebook tleirawl zinga hmang kan tam vang a nih hlauh chuan a paw ang. Kan ni tin nun leh zirlai tibuaitsu a nih leh nih loh chu a hre rual kan ni a, nu leh pa leh zirtirtute bum emaw kan intih lai khan keimahni kan inbum a, zirlaiah a result chu a rawn lang mai dawn a ni. Kumin HSLC-a pakhatna 'Lalfakzuala' khan facebook hi duh hun huna khawihna tur mobile phone, Class X a pass hma kha chuan zuk nei lo tat a. Thian tam tak mai offline leh online-a neih hi hlimna min petu a ni dawn emaw tih a awl khawp mai, mahse hlimna zawk chu kan nun, thiante nei teuh lo mah ila, dik tak, tha tak 'quality' taka hmana, nu leh pate thu awih hi hlimna chu a ni.

Tleirawlin engtin nge a awm dan a tihthianghlim ang? I thu ang zela a awm dan veng thain (Sam 199:9).

CHAWLHNI SERH LOH PAWINA

- Annie lalmangaihi
Kulikawon, Aizawl

Hmanlai hian mipa naupang fel tak Rintea hi a awma, a nu leh pa leh Zirtirtu te thu a awih êm êm mai a, tih tur an sawi chang te hian a hnial ngai lova, lehkha te a zir peihin Examna ah pawh hian pakhatna niin lawmman te hi a dawng ziah thin a, zirtirtu te fak pawh a hlawh hle thin a ni.

An thian Mawia chuan chu chu a lo hriatin a itsik ru ta hle maia, thil sual tih tir tumin a thlem tan ta a, mahse Rintea chu naupang feltak a nih avangin Mawia chu huaisen takin a hnial zel thin a.

Nikhat chu Mawia chuan Rintea chu inkhawm lova intihhlimna hmuna kal puiah a sawma, Rintea chuan a tirah chuan a duh lova, mahse a sawi nawm hmel tawlh tawlh sia, a tawpawh chuan Rintea chuan 'Aw le' tiin a chhang ta maia, chawlhni a lo nih chuan an pahnih chuan inkhawm lovin intihhlimna ah chuan an kal dun ta a.

Tui an chen naah chuan Rintea chu a zuangthla suala a keruh a ti tliak palh ta hlauh maia, Mawia chuan hmanhmawh takin Damdawi in ah chuan a hruai ta nghala, a nu leh pa te pawh chuan an hriat ve leh Damdawi

in chu an rawn tlan thleng ve nghala, Rintea chuan, a nu leh pa hnenah chuan zak tak leh pawiti a inchhir ngawih ngawih chungin a awmdan diklo chu a hrilh ta vek a, a nu chuan tawngtaia Pathian hnena ngaihdam dil turin a hrilh a, Rintea chuan a nu sawi ang chuan Pathian hnenah tawngtaiin ngaihdam a dil ta a, Rintea chu a hnu thla khat velah chuan a lo dam ve leh ta a.

Keini Kristian Naupang te hian Pathianni serh lova, inkhawm thulhin intihhlimnaa kal te, infiam te, computer games khelh mai mai te hi kan tih tur a ni ve lova, Pathian chuan chawlhni hi serha, a thu ngaithla tur te, a rawngbawl na atan tea hmang turin min pek a ni a, kan duh ang anga hmang mai mai tur kan ni lo a ni. Chawlhni kan serh loh hian Pathian pawti kan sawia a huat zawng kan ti a ni tih i hre theuh ang u.



Hriatzauna Huang

- Lalremmawia

1. Kum 1979–1990 chhunga Britain prime minister Margaret Thatcher-i (1925–2013) kha a huaisen avângin *Iron Lady* tia hriat lar a ni a. Mi dang, *Iron Butterfly* tia hriat lar a awm bawk a, chu mi chu kum 1965–1986 chhunga Philippines president, Ferdinand Marcos-a nupui Imelda Marcos-i kha a ni thung.

2. Tun hnaia Mizorama car rawn chhuak thar zinga mi, *Chevrolet* car hi car intlansiak driver Louis Chevrolet-a hming chawia phuah a ni a; kum 1911 khan he car company dintu, William Durant-a chuan car design turin Chevrolet-a hi a lo sawm tawh a ni. Chevrolet car hi India rama car siam chhuah hmasak ber a ni bawk a, kum 1928 khan Bombay bula company hmunah rem khawm a ni.

3. Khawvel Indopui pahnihna (1940–45, 1951–55) hun laia British prime minister huaisen Sir Winston

Churchill-a (thu leh hla avânga Nobel Prize dawngtu ni bawk) kha Blenheim lal in atanga hnai te, Baldon biak in tualah phum a ni a, chu chu kum 90 kal taa a pianna hmun chiah a ni.

4. India rama mobile phone hman hmasa bertu chu West Bengal chief minister Jyoti Basu-a (1914–2010) kha a ni a, kum 1995 khan Telecom minister Sukh Ram-a a bia a ni.


5. Lal Isua pianna, Bethlehem khua khu kum tin mi maktaduai 1 leh nuai 4-in an tlawh thin.

6. Jerusalem khu Kristian, Juda leh Muslim-ten khaw thianghlimah an ngai theuh.

7. Roman Catholic Kohhrana Cardinal-te hi kum 80 an tlinin an hna atangin an chawl thin.

8. *Taliban* tih hi *Islam* zirilaite tihna mai a ni.

9. *The Da Vinci Code* tih bu kha French history-a lehkha-bu hralh tam ber a la ni.

CROSSWORD NO. 5

A PHEI : 1. 'Mihring' tihna (5); 3. Thil tisualin an tuar thin (6); 8. Fa/Nu tak ni lo (5); 9. Puithiam hnam thlahtu (5); 11. 'Kawkalh' tihna (5); 15. Tehna chi khat hming (5); 16. Elija puanin Jordan lui a vaw chat (2 Lal 2:14) (5); 17. Eden chhak lama ram (Gen 4:16) (3); 19. Paulan chibai a buk (Rom 16:12) (5); 20. Bânsan tur zinga mi (Eph 4:31) (6); 21. Abib thla hming dang (5).

CROSSWORD NO. 4 DIKNA

S	A	I	I	P		A	R	A	B	I	A	
			S		D	A					B	
G	O	G	A		U	P	H	A	R	S	I	N
			I		L	K					S	
			D	I	A	N	I		A	K	A	N
			A								I	
			M	E	R	O	M		E	L	I	J
			A				I		L		N	
			I	S	R	A	E	L	H	O		L
			K				E		I		A	
			A	B	R	A	M	A		H	R	I

A CHHUK : 2. Israel hnam pakhat (6); 4. Mi a chuk thei (3); 5. Juda lal (3); 6. Chak lote mamawh (6); 7. Invuakna hmanraw chi khat (9); 10. Lal Ahasuera nupui hmasa (5); 12. Falakho chenna tur (Zak 9:6) (7); 13. Zakaia lawinna thei kung (7); 14. Saphiri pasal (6); 17. Isua taksa an chhunna lai (4); 18. Tehna chi khat (3).

CHEI CHHUAH




Ruatruata chuan a duh hle!



Chei dân tûr

1 = Pâwl, 2 = Eng, 3 = Sen, 4 = Hring,
5 = Sêrthlum rawng, 6 = Nàwihnâwk, 7 = Uk



Bible Milem : EZEKIELA




Bible Milem : EZEKIELA



Bible Milem : EZEKIELA

EZEKIELA'N THU A SAWI A,
RUHROTE CHU AN INZAWM
LEH A.

AW, NUNNA
THAW, HENG
RUHROTE
HI TINUNG
RAWH-




ISRAEL
HNAM DARH
TATE CHU KA
HRUAI KHAWM
LEH ANG A, HNAM
ROPUI TAK AN LO
NI LEH ANG.

AN LO NUNG LEH A,
SIPAI RUAL CHAK TAK
AN LO NI TA A.




Bible Milem : EZEKIELA

AWM ZEL TUR



KA HMUH ANG HMU THEI RAWH



A chung a lemziak chi hnih khi ngun takin en la, a inan lohna chi ruk hmu thei rawh.

A hnuaiah hian a chhanna lo ziaak la

- 1.....
- 2
- 3.....
- 4.....
- 5.....
- 6.....

A chhanna chu thla lehah kan rawn chhuah ang.

To,

*Unaute hmangaih karongah chuan hmangaih takin inlalnai taon iheuh nrauh u;
chacoinawi karongah chuan indihsak taon iheuh uli;*

Rom 12:10

